



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:
 30 грошей місячно,
 80 „ квартално,
 1.50 „ полрочно,
 3 зл. рочно.
 В Америкі: 1 дол. рочно.
 В Чехословакии:
 2 кор. місячно, 10 кор. полрочно,
 20 кор. рочно.
 Ціны оголошень:
 Ціла сторона 120 зл., $\frac{1}{2}$ сто-
 роны 60 зл., $\frac{1}{4}$ сторони 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
 оголошення малы за 1 мм. 20 гр.,
 в тексті 30 гр., перед текстом
 40 гр. При місячном и долгом
 оголошеню значна знижка.
 Конто чекове Нр. 404.155.

Новы закиды в Сеймі против polityці метрополита Шептыцкого.

На засіданю Сейма дня 16. т. м. референт бюджета внутренних справ, посол Войцеховский со Львова заатаковал вторично polityчну діяльність метрополита Шептыцкого и зажадал от греко-кат. метрополии выяснения тых закидов, яки формулюют ся публично от долшого часу и дотычат фондов, вырученых с продажи церковных грунтов.

Дальше пос. Войцеховский поддав крытыці polityчну діяльність украинского духовенства и наводит интересны факты поданы через сениора Ставропигийского Института г-на Антония Гулла. Гулла ствердил, же по світовой войні галицкы гр.-кат. епископы дали ся втягнути в украинофильску polity-

ку. В той ціли принимали они до семинаров переважно лем бывших офицеров украинской армии, котрыма погодивше обсаджали парохии и таким способом бунтовала ся теперешна воююча украинофильска церков. Результатом той polityкы ест передовсем переслідоване старых рускых священников.

Пос. Войцеховский закончил свою бесіду пригаданем инцидента Йорданского во Львові, коли то метрополит Шептыцкий отказал войску в принятию участи в водосвятыю.

Бесіда посла Войцеховского была живо коментована через польскы газеты всіх polityчных групп.

—oOo—

ДЫКТАТУРА В РУМУНИИ.

Утворене недавне в Румунии правительство Гогы было побідом партии народо-социалистычной. Правительство того подобало ся в першой мірі Гитлерови, бо в Румунии зачал панувати подобный дух як и в Німеччині. Як в Німеччині, так и в Румунии уявила ся нетерпимость национальных меншинств. Звернено ся в першой мірі против жидам, котрых старано ся выселити.

Понеже партия Гогы не мала потребного большинства в парламенти, розвязал Гога парламент и росписал новы выборы. Здавало ся, же ціле жите в Румунии прибере нове русло. Тымчасом не уплынуло пару неділь, а

правительство Гогы упало и оголошено **королевску диктатуру**. Сторонники Гогы покрыли ся, а многих арестовано, бо показало ся, же верховоды партии народо-социалистычной робили все на приказ одной чужой державы и служили радше той державі, а не своей отчині.

Тепер президентом рады министров ест назначеный патриарх Мирон. В Румунии оголошено военне положене, а выборы до парламенту отложено на неограниченый час.

Со змін тых ест сильно невдоволена Німеччина, чого не крывают німецкы газеты.

—oOo—

Встріча Шушнига с Гитлером.

До Берхтесгаден, місцевости, в котрой пробыват тепер канцлер Німеччины Гитлер, приїхал канцлер Австрии Шушниг разом с вице-министром Шмидтом и гофратом Вебером. Выїзд канцлера Австрии был неожиданный и старано ся его удержати в тайні. Встрічі обох канцлеров придають велике polityчне значене. Канцлер Шушниг бавил у Гитлера всего пару годин и по переведеню с ним долгой конференци, выїхал с поворотом до Австрии.

Темом розговоров меже обома канцлера-

ми мало быти уложене ся взаимных отношень меже тьма краями. Инициятыву непосредной конференци обох канцлеров мала дати Италия.

Газеты льондонскы доносят однак, же в Відні предложена Гитлера встрічили ся с великом резервом, а навет с неохотом. Президент Микляс не затвердил проекту нового порозумпеня німецко-австрийского, обговореного в Берхтесгаден.

—oOo—

Вчийме ся щадити.

Ощадность ест то штука ку котрой треба от молодости привыкати так як и ку каждой роботі. Мала дітина мые ся неохотно и ходила бы напевно все брудна, если бы мама не примушала ю умыти ся каждого дня. Таксамо мала дітина не здае собі справы с вартости гроша и одержанный пінязь обертає звычайно на непотребны річи. Марнуе она также инше добро, як хліб, одєж, обув ит. д., и аж коли подросне и набере розуму, зачинат шанувати свои річи.

В послідных часах власти школьны звернули больше увагы на виховавчу сторону школы и тепер школа учит не лем читати, писати и раховати, але уважно слідит за навьками у дітей, при том добры навькы старат ся у дітей розвивати, а злы викоренити.

В гдеяких школах введено пропаганду малой ошадности. В порозумленю с финансовыма инстытуциями школа достає от тых инстытуции пушкы, до котрых діти шмаряют каждый непотребный им грош, притом учитель провадит сам выказ и выставляє дітині щаничу книжечку. Дітина тішит ся одержаном книжечком и хоче видіти в ней як найбільше записаных позиции, не купує уж цукорков, тісточок и других непотребных а часто и нездоровых ласоцей, а несе грошкы до касы. Таким способом учит ся щадити.

Пробы того способу ошадности впровадила **школа в Крыниці Селі** и проба тота дає барз добры результаты, бо за 5 місяцов діти школьны тьма малыма сумами ускладали уж и маюєт на щадничих книжечках перешло **250 злотых**.

Пушкы, выказы и книжечкы дала школі в Крыниці

Комунальна Каса Ощадности
 пов. Краковского, Отділене в Крыниці,

котра кромі того прирекла грошевы нагороды для тых дітей, котры будут пильно и стало складати гроши до касы.

Комунальна Каса Ощадности в Крыниці може дати свои пушкы и иншим школам в ціли пропагованя ошадности и привыканя к ней. Справа вартат заходу. Свідчит о том школа в Крыниці, где давнійше гроши тоты выдавали діти на ни се ни то, а тепер маюєт на книжечці поважный капитал.

Нова офенсыва Коминтерна на европейскы державы.

„Правда” опублікувала сенсаційну выміну листов меже етатовым агитатором союзу комунистичной молодежи в окрузі курском Ивановым и Сталином.

Иванов выписал до Сталина лист, в котром жалит ся, же оскаржено его о „троцкизм” за того, же он твердил, што „лем побіда социализма во всіх краях обезпечит дефинитивно СССР. перед всіма интервенциями из заграницы.

Сталин отписал, што поділят вполні погляды Иванова и заявил, што покаль СССР. ест окруженный через державы небольшевицкы — то не ест он обезпеченый перед интервенциом из вні и перед пробами привернення устрою капиталистичного.

„Штобы обезпечити Совіты перед интервенциом — заявил Сталин — треба вскріпити узы меже роботничом клясом СССР. и клясом роботничом в державах капиталистичных в цілі сорганізованя політычной помочи со стороны клясы роботничой для СССР. на случай войны с Совітами, а также сорганізовати помоч совітской клясы роботничой для роботников держав буржуинных.

Кромі того треба всіма средствами вскріпити червону армию, марынарку и воздушны силы и держати цілый народ в мобілізаційной готовності.

Заявленє Сталина оціняють яко оживленє акции Коминтерна и яко оправданє интенсывных вооружень совітских.

Як жиют люде в Венгрии.

Недавно выїхал с Польщи регент Венгрии Горти. С его приїздом росписали ся широко газеты о самой Венгрии и ей населеню.

Наша Лемковщина має спеціальний сентимент до Венгрии, бо стары памятают ище добре тоты часы, коли то по св. Петрі выбедали ся с наших сел паробци, дівчата и молоды хлопы на зерняны роботы „на маляр” и вертали под осень с возами, напеленыма мішками с пшеницом и дебречинском солонином. С выїздами тума лучит ся не одна лемковска співанка, а вплив чардаша на лемковску музыку ест очевидный. Наш „обертанный” то лем переимаченый чардаш, а пісня „як я пойду на Маляр” сама подносит ноги в гору и заохочат до того дикого танца.

Звязь Лемковщины и Венгрии затіснила ся также через торговлю. Славны „сейкы” мусіли украшати давнійше обору богатого лемковского шолтыса, без сейок не могла выдати ся дівчина, сейкы” были ознаком доброго тону порядного хлопа. Могли быти у газды чотыры „ружилкы” але шолтыс все был гонорнійший, бо мал сейкы. Ёй, бо красны то были

волы. Сереть на них сиваво-мышата, сами высокы, а рогы — именно тоты рогы то был цілый вальбор, цілый смак сейок. Розложены широко над головою, легко закривлены вперед и ку горі, доходили нераз до 1¹/₂ метра долготы каждый. Была то правдива красота, а и добра оборона.

Сейкы нераз боронили ся тума рогами перед волками и не оден волк згынул набитый на роговый рожен. Сейкы мають задивляющий инстынкт самообороны, котрый подсказує им збивати ся в купу в разі появляня ся волков и ставати задами до середины, а рогами в сторону нападающих волков. В такой позиции біда волкови, котрый достане ся под рогы сейкы. Оден зручный и скорый рух головы, а уж волк вые перебитый рогом, або катулькат ся далеко, шмареный рогами с небывалом силом. В Венгрии сейкы жиют на пол дико на величезных степах, званых пуштами, и сут уживаны до роботы и на мясо. Сут они выносливы, жиют літом и зимом на поли и молоды родят ся на снігу. Уживаны до роботы дают ся кути так як коні.

Кромі той породы скотины, котра не надає ся на молоко, ест там ище друга раса молочна. Молочность у коров ест лучша як у нас бо там ест звычай, же коровы, котры дают меньше як 10 литров молока денно, перезначают на заріз. Притом молочны коровы кормит ся там добре.

Як уж с того видно, фундаментом господаркы венгерского хлопа, ест так як и в нас, годовля статку. Кромі рогатой скотины ховают там также много красных коней, ублагородных арабами и англиском расом. Табуны тых коней жиют также на половину дико в венгерских пуштах. Знают о том также стары лемкы, котры нераз приводили от тамаль „каштаны” и „шимлі”.

Главным рольным продуктом венгерского хлопа ест пшеница: Ест то зрозуміле, як возьме ся под розвагу, степовой чернозем венгерской низины и теплый тамтешный климат. Кромі пшеницы венгерскы хлопы продукують много кукурудзы, рослин окоповых и паш, а лем барз мало жита. Бандурок не садят праві совсем. Вмісто бандурок іст населене горох.

На загал хлопы венгерскы жиют лучше як у нас. Хаты мають чисты и порядны, в хатах сут ванны. Высокий уровень годовельной продукции осягнули венгерскы хлопы через кооперацию, котра ест там сильно розвинена. Особенно сильный ест там кооператыв опасаня свиней, котрый обнимат пару тысяч селян и опасат одночасно понад 6 тысяч свиней. Кооператыв тот хоронит хлопа перед вызыком при продажі свиней и експорті за границу, а также подає средства, як кормити свині, штобы они опасали ся скоро.

Кромі организации сельско-господарчих будуют венгерскы хлопы по селах народны дома, в котрых містят ся читальні, библиотеки, салі до забав и т. д.

Великы венгерскы ровнины надають крайобразови вид дикый и однообразный. По степах віют сильны вітры, котры уносят туманы порошу, серед котрою гарцуют табуны коней. За нима жене на коні венгерский пастух, котрого там называють „чикош”.

Што то ест Радио?

(Доконченє).

Місце, в котром вытворяють електричны волны, называт ся: „надаюча стация”. С надаючом стациом ест получене дротами т. зв. „Студио”, где отбывають ся промовы, концерты, хоры итд. перед микрофонами.

Летит отже таким способом пісня, музыка, або бесіда по широком світі. Летит незвычайно скоро, бо перелітат 300 тысяч кильометров на секунду, може отже в секундї облетіти пару раз землю доокола. Летит по всіх напрямках и тепер треба уміти ю зловити. Ловиме тоты електричны волны, несучи звуки звычайным роспятым дротом, званым **антенном**. Зловлены через антену звуки приносят нам антена до помешканя. Тепер иде голос уж по дроті и достає ся до т. зв. **детектора** (ест то кусник кришталу, або электронова (радивва) лампа. Детектор переиміят електричны волны так, же слухавка получена с детектором и приставлена до нашего уха, може на тоты волны реаговати (отповідати), бо слухавка реагує не на каждую електричну волну, а лем на спеціально добрану. Иншими словами, детекторы пуцают на слухавку такую електричну волну, котра выкликне такы дырганя в слухавці, якы мы чуєме яко звуки. Тоненька бляшка в нашой слухавці дыргат так само, як бляшка в микрофоні в студио мы чуєме тоты самы звуки, якы дана особа, або даный инструмент выдали перед микрофоном.

Главны отже складники радия сут: микрофон, радиевы лампы, вытворяючи електричны волны при стации надаючей и — антена, детектор и слухавка при стации принимаючей, котром ест каждый принимающий радио-апарат.

Але ріжны посылаючи стации посылають волны ріжной долготы, тому принимающий апарат має ище додатковы знаяды (конденсаторы и звои дротов), котрых задачом ест настроити принимающий апарат до одной означеной долготы волны. Коли хочеме почути стации дуже отдалены, мусиме скліпляти електричны волны, котры попадають в нашу антену с тых стаций. До скріпляня уживаєме знова электроновых лампы,

и от их числа в принимаючом апараті зависит, с як далека можеме ловити електричны волны.

Если хочеме штобы музыка чи співу могло слухати одночасно много людей, то до принимаючого апарату влучаєме вмісто слухавок т. зв. **голосники** (мегафоны).

Тепер уж нетрудно дати отвіт на пытанє: што то ест радис? **Радио ест то апарат, котрый переає на отдалене звуки людского голоса, инструментов итд. при помочи електричных волн, якы расходят ся в пространстві во всіх напрямках без посередництва якых нибудь проводов (нпр. дротов).**

Радио ест напавду чудом новочасной техники и може принести людам огромны користи. Оно як бы касує отдалене меже людми, бо уж не лем звуки голоса и музыка, але также образы зачинають переносити с одного місца на друге бездротным способом.

Одного отчиту могут слухати миллионы людей одночасно. Подумайте отже, як скоро може расходити ся в світі знанє и наука. Селянин, сідячи у себе в хаті, може слухати цілых рольничих курсов и за дармо може научити ся не одной практычной річи. Прото не дивота, што в западных краях Европы радио стало ся загалным потребом населеня так по містах, як и селах. Радио заступат нам книжку, и то не одну, але много, бо через радио подають всі відомости. Маючи радио, може каждый научити ся много добрых річей, а може также усміяти ся и розвеселити, бо через радио подають также ріжны жарты, спів и музыку.

На жаль у нас радио мало ся росширило. Складають ся на того ріжны причины, а передовсем досыт висока ціна самого принимаючого апарату. Добрый апарат с мегафоном куштує ище и тепер около 300 зл., а детектор со слухавками около 70 зл. Кромі того треба місячно оплачати за радио 3 зл. на почті. Поодынокото отже селянина не все стати на такой выдаток, але повинни придбати радио всі читальні им. М. Качковского, бо оно даст членам читалень много потребных відомостей и зная, и через музыку, співы и концерты стягне и инших до читалень.

Груда у коней.

В осени и в зимі западають коні часто на груду. Не єст то хворота заразлива, але занедбана може росширяти ся чим раз больше и спричинити неспособность коня до работы на долгий час. Груда зачинат ся от запаленя скоры над копытом. Повстає втотчас коли ноги коня не сут удержаны в чистоті. В осени и в зимі трафят ся часто, же конь, ступаючи по болоті и западаючи в него глубоко, може заболотити ноги. Если их не обмые и не осушме, болото присыхат и грудки болота и пороху достають ся аж до скоры, натерають ю и в повсталых от того нажертях скоры осідають бактерии, поводуючи запалене скоры. На скорі творят ся малы коросты, котры тріскають, выдїлаючи лепку теч. Теч тота засыхат, скоро над копытом стає ся тверда и если господар не приступит зараз до курации, то струны роспирають ся, нога стає ся обирміла, червена и горяча. Наконец скоро твердне так, же при згннанню ноги пукат, творячи великы, глубоки раны, котры росширяють ся аж по коліно.

С того, што выше написано, видно, же коні западають на груду лем втотчас, коли господар не дбає о чистоту их ног. По заболоченю треба коням ноги вымыти водом и вытерти до суха шматком. Дылины стелити так, штобы коні не стояли в мокрому навозі, бо гнояница, достаючи ся все над копыто, може также спричинити груду.

Колі спостереже ся груду, треба коня конче куровати. В той цілі треба коневі вымыти старанно ногу літном водом и глицерыновым мылом, штобы усунути всякий бруд. Пак треба ногу осушити, найперше чистом шматом, а погодивше ватом. Як нога єст совсем суха, промыват ся ногу спиртом змішаным с оливом (на 1 часть спирта 2 части оливы). Понеже спирт с оливом ся не лучит, прото перед ужитєм треба фляшком пару раз добре потрясти.

Если скоро єст легко червена, то выстарчит намазати пак ногу цынковым мастю, овинути газом и завязати. В разі потреби зроби ти тоту пару раз. Если однак груда єст застарїла и утворили ся уж глубоки раны, то по вы-

Чистка в німецкой армии.

Уж от долгого часу Гитлер, котрый позатым был правдивым диктатором Німеччины, смотрїл неохотным оком на німецку армию, котра была властиво от него независима и относилась до него и єго сторонников с великом резервом.

В німецкой армии цілий офицерский штаб рекрутовал ся с німецкой аристократии, котра в своей думі не могла респектовати Гитлера, Геринга, Гебельса и инших, хоцбы лем прото, што они при своих назвисках не мають „фон“, означаючого аристократичне походжене.

Зрозумїла річ, же пань-офицеры волїли бы видіти во главі державы якогоси аристократа, хоц бы и Гогенцолерна як Гитлера и приготавливали ся до зміны политычного устрою Німеччины, усуненя Гитлера и покликаня сына Вильгельма, яко цисара Німеччины.

Гитлер довідал ся однак на час о намірєнях нїм. генералов и усунул их с занимаемых становиск, а двох с них — проводыров противгитлеровской акции, — ген. Фритча и ген. Бека казал арестовати. Чистка в німецкой армии обняла понад 190 высших офицеров.

мыттю раны спиртом с оливом треба рану смазати ліком зложеным с 2 граммов йодоформу, 4 граммов йодыны, 7 граммов хлороформу и 30 граммов глицерыны. По высмарованю рану прикрити газом, приложити вату и завязати. Так треба робити каждого дня, аж до цілковитого выгоиня. За каждым разом треба рану вымыти старанно спиртом с оливом. Воды уживат ся лем раз оден при першом вымыттю ноги с болота, пак воды уживати не можна. Ногу все овязати, штобы до раны не достал ся порох и бруд.

Коня не можна уживати до работы, повинен он стояти в стайні на сухой соломі, котрой не треба жаловати.

Если дошло аж до ропоного запаленя, треба закликати ветеринара, але при уважаню на коня господар до того не допустит.

Як куровати охват у коней.

Проявы охвата сут такы: ноги колчаніють, копыта стають ся горячи, конь отдыхат скоро и тяжко, має горячку. Коня треба в таких разях роскути и поставити в теплої стайні на грубой верстві соломы.

Если копыта сут барз горячи, овинути их ряндом и часто зливати студеном водом через дві doby. Можна коневі упусти ти 3—4 литры кырви с жилы на шию, але николи не пушати кырви с ног. Коневі вляти до пыска 2 лжицы альбесу роспущеного в воді, встрікнути на шию под скору 5 центыметров кубичных салицылевого металю.

Кормити сіном, до воды додавати отруб. Колі копыта остудят ся, коня треба каждого дня проганяти по піску.

О испанской войны.

Ведля комуникату головної кватеры повстанчой, республиканскы войска были розбиты на теруельском фронті и понесли великы втраты.

Натомїст республиканским войскам посчастлило ся опановати долину рікы Цильога, котра уходит за найурожайнїйшу закутину Испаниии.

Як с того видно — рішительной побіды не може отнести жадна с воюющих сторон.

Самолеты ген. Франко метали бомбы на военный французский пароход, але жадна бомба не трафила и жертв не было. Пароход открыл арматный огонь и примусил самолеты отлетіти.

Туркы вернут до родного краю.

Меже Болгариом и Турциом має прийти в коротком часі до нарад, котрых цілю буде справа поворота до Турции полтора милиона турков, жиющих в Болгарии. На нараді мають ухвалити право забраня со собом через турков грошей, якы достанут за проданы грунты и инвентар.

Турецке правительство має уділити вертаючим на родину туркам кредыту в высоті 3 милионов турецкых фунтов.

Чи дал ты уж жертву на Руску Бурсу в Горлицах? Если ні, то зроби то, як найскорше!!!

Нищенє шкодников в саді.

Добры садовник не занедбає овочевых дерев также и в зимі. Передовсем зима надає ся добре на нищенє на деревьях яичок и лярв ріжных шкодливых овадов.

В зимі, коли нїт листя на деревьях, легко єст вынищити тоты лярвы и яичка через обильне опырсканє овочевых дерев 5-процентным росчином садовничой карболины „Д. К. М.“, беручи на каждые 100 литров воды 5 кг. болины.

Карболина „Д. К. М.“ не роспущат ся в воді, лем творит с нѐм молочну емульсию. Если отже спостережеме, же по змішаню карболины до воды, на воді не творит ся молочна поволока, то єст доказ, же продано нам препарат сфальшованный.

Кромі яичок и лярв нищит карболина также мох и старыи здеревянілыи дубок на деревьях.

Карболины можна однак уживати лем в зимі, коли пупкы дерев ище не розвивають ся. В том часі не шкодит она пупкам и дерева опырсканы карболином можна уж здалека на весну познати, бо отличают ся они блинчаком кором и сильными, темно-зелеными листками.

На весну, коли уж пупкы сут грубы, карболины уживати не можна.

Хлопы жадають обнижкы цін штучных навозов.

В послідных днях на руки вице-премера и министра финансов, министра рольництва и министра торговлі был зложеный через рольничии организации мемориял, в котром домагають ся обнижкы цін навозов штучных.

Жаданя свои мотивуют тым, што положенє на зерняном рынку єст непевне.

Селяне, купуючи тепер штучны навозы, не знают, яка буде в будучом року ціна зерна и прото, боячи ся рызыка, вздержуют ся от купна навозов штучных.

Тот факт, же в послідных роках селянство куповало больше штучных навозов не доказує, же штучны навозы ся оплачают, бо селянин, видячи, што єго грунт уж совсем выловил, мусил ратовати ся перед катастрофом и закупити штучны навозы аж и по цінах не выдержуючих господарчой калькуляции.

Прото тыж с того факту не належит снущи конклюсии, же селянам отвічают теперешны ціны штучных навозов.

Слинавка єст заразлива для людей.

На терені Польщи выдано ряд заряджень, стремячих до охороны перед слинавком. Особенно остры зарядженя выдано в западных воеводствах, где слинавка почала ся уж появляти.

Санитарны власти перестерігають перед том заразом, котром може заразити ся также человек. Зараженє наступат найчастїйше через пите невареного молока, походячого от коров, хворых на слинавку.

В Редакции „Лемка” в Крыниці можна достати ріжны книжочки религийного содержания.

Што чути в світі і в краю

Полярна зоря. Перед пару тижнями над цілим краєм видно було на небі червену луну, котра приймала ріжний вид. Початково думано, же за горами вспыхнул гдеси сильний пожар і освітил гори. Аж потом виявилось, же ест то явлене неземельне і же землю освітлят полярна луна, котра ест одынокым світлом через 6 долгих місяцов зимы в краях положеных на далеком бігуні.

Полярна зоря появлят ся однак часом і у нас, як то мало місце того року і цікаве ест, же такы появляня ся полярной зорі повтарают ся звычайно што 11 літ, раз сильнійши так, же их видиме, другый раз слабши, невидимы для ока, а обявляючи ся лем забуренем магнетычным.

Учены поясняют появляне ся у нас полярной зорі повстаючима от часу до часу пятнами на сонци, котры то пятка выкликують певны забуреня магнетычны на землі, котры не остают без впливу на успособлене людей.

Люде под впливом магнетычных забурень стают ся неспокойны, нервовы, скоры до звад і подпадают ріжным хворотам. Прото тыж в літах такых магнетычных забурень може легко дойти до воен або появити ся зараза.

Тому то не без основаня люде на селі пророкуют, же появлене ся на сонци плям і ріжних плянет на небі ест віццунном воен, хвороты і ріжной біды.

Заражена вода причиною смерти многих людей. От жолтна минувшого року в англицком місті Кройдон недалеко Лондона не выгасат брюшний тыф, котрый потягнул уж за сообм 43 смертны случая.

Спеціальна санитарна комісія, покликана до розслідженя причин тыфа, ствердила, же зараза росширила ся по поводу недбалости дырекциі водопроводов.

Оказало ся, же в жерелах воды, заосмотряючих водопроводы в Кройдон, робил хворый на тыф роботник. Аж і втотчас, коли роботник умер, не поддано воды с жерел десьинфекциі і заражено водопроводы тыфосным бакцылем. Тото спрочинило велике роспространене ся епидемии і смерть многих людей.

Соя, яко рослина промыслова. У нас мало знана ест соя. Ест то рослина о зернятках подобных до малой физола і отличаючих ся тым, же мают в собі много олію. Наибольше сои плянтуют у нас на Воляни, в инших закутинах не ест знана.

Сойом заинтересовал ся сильно знаний амерыканскый король автомобилей Форд, котрый засіял сойом тысячи гектаров своих теренов, положеных коло Детроит, а в его фабрыці сут спеціальны ляборатории, в котрых учены инжинеры робят баданя над том рослином.

Чом же Форд заинтересовал ся так сильно сойом?

Соя ест ведля его мніня будучностю амерыканского промысла. Олій, якый дае тот рослина, надае ся до выробу лякеро, котрых Форд уживат уж от давна до лякерования каросерии.

Волокна сои, спеціальнo перероблены і спрасованы дают елястычный материал, котрый може заступити дерево. Але Форд не перестае на том. Его ляборатории слят ся выпродуковати матеруял так твердый і елястычный, штобы можна ним заступити части ме-

талевы каросерии, а може аж і части самоходных колес.

Засыпны сніжны в цілої Европі. Тогорочна зима приносить нам што якыйс час новы несподіванкы. То тепле, праві весняне сонце, то знова зачинат курити і приходят морозы.

В послідных днях упали великы снігы в цілої Польщі, котры в многих місцах засыпали так дороги, же перервали автобусову комуникацію. Гдекади были перерваны проводы телеграфичны і телефоничны.

Але снігы упали не лем в Польщі. Аж і в сонечной Италиі присыпали снігы грубом верством землю, а в Апенинах шаліли сніжны бурі.

Через Сардынию і Тирренске море перешол сильний оркан, котрый вырядил величезны втраты. На Сардыниі вітерница повывала с коренями 100-літны дерева.

Также в гористых окрестностях Палестыны і Сырии упали великы снігы, выряджачучи шкоды. Дорогы, ведучи через горы Либана сут засыпаны снігом.

О сніжных бурях доносят также с Морав і Німеччины. В Баварии по долгих дожджах пришли сильны морозы. Великы масы снігу утрудняют комуникацію, а ряд получень телеграфичных і телефоничных сніжны задувкы сорвали.

Бутенко был убитый агентами Г. П. У. Слідство, ведене в справі совітского посла в Букаресті Бутенкы, котрый счезнул в Букаресті в незнаний способ, выказало, же Бутенко не живе.

Ряд обстоятельств каже предполагати, же Бутенко был замордованный через меженародну шайку, будучу на услугах Г. П. У. Тота сама шайка убила своего часу агента коминтерна Рейсса в Швайцарии.

Агенция „Трансконтиненталь Пресс“ вычислят навет назвиска убийц. Мают нима быти: Меркунов, Синицын і Фрейман, котры живут стало поза границами Румунии, а приіхали до Букареста лем по того, штобы зликвидовати Бутенка.

Совітска полярна експедиция в опасности. Перед парунадцетомо місяцями выіхала на полночный бігун совітска наукова експедиция с проф. Папаниным во главі. Выправа тот мала на цілі поробити науковы досвіды на бігуні.

Корабель, на котром іхали учены розбил ся о могучи ледовы кря. На одной крі находит ся експедиция Кра посуват ся ку полудневи, в край теплійший, где грозит ей ростоплене. Уж тепер потріскала она в пару місцах. Проф. Папанин має на крі надательну радиостанцію і доносит, же кра поменьшала ся о 200 метров ширины. Провиянтов має выправа ище на 3 місяцы.

На помоч розбиткам поплынул совітскый ледокол „Таймыр“, котрый отнашол уж кру с розбитками і находит ся от ней о 20 километров. Кра, як доносят с ледокола, находит ся серед грубезных ледов і прото трудно ся до ней достати.

145 убитых в бою фанатыков с полициом. В Бразылии дошло меже религийныма фанатыками і полициом до боя, котрый продолжал ся 24 годин. В бою том было убитых 145 люда, в том числі 5-ох полициантов.

Добошинский засужденый на 2 рокы вязницы. Знана была перед двома роками ребелия в Мысленицах, коли то инж. Добошинский собрал шайку і с ньом ударил на постерунок полициі в Мысленицах, обезоружил его, а потом шайка напала на жидовскы склепы. Против Добошинскому переведено росправу в Кракові і судии присяглы признали его невинным.

Запротестовал против тому прокуратор і друга росправа закончила ся тепер перед судом во Львові. Суд засудил его на 2 рокы вязницы, вчисляючи ему арест слідчий так, же Добошинский має до отсідженя ище 4 місяцы.

МОЛОДЫЙ с добром практыком организаторинструктор хора церковного і світского добрый режисер, руководитель культурно-просвітительного життя читальні глядат занятя.

Условия по договору.

Адрес: Крыжановский Михаил, Бобрка
почта Лобозев, пов. Леско.

Куплю

„РУСКЕ ПАЛОМНИЧЕСТВО”

составлене Алексием Булка со Скварявы
выдане в Коломый в р. 1906.

Писати до Админ. „ЛЕМКА”, Крыница 2.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л ь н я : К Р Ы Н И Ц А, тел. 112.
В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.